

ASUNTO: APLICACIÓN DA *NORMATIVA DE PERMANENCIA E PROGRESO DO ESTUDANTADO DAS TITULACIÓNS OFICIAIS DE GRAO E DE MÁSTER UNIVERSITARIOS DA UNIVERSIDADE DE VIGO* PARA O CURSO ACADÉMICO 2016-2017.

Para o seu coñecemento e para que poida informar axeitadamente ao estudantado afectado do seu centro ou titulación, comunícolle as seguintes instrucións para a aplicación da *Normativa de permanencia e progreso do estudantado das titulacións oficiais de grao e de máster universitarios da Universidade de Vigo* (aprobada polo Consello Social o 2 de abril de 2013, e publicada no DOG, de 19 de abril de 2013) para o curso 2016-2017:

1. Admitirase por defecto a matrícula aumentada ata 75 créditos que establece o artigo 3.6, reservándose a posibilidade de que os centros responsables das titulacións soliciten expresamente exercer o seu control mediante o requisito do visto e praxe ao que se refire o dito artigo. No caso dos centros que opten por esta posibilidade, o alumnado afectado deberá efectuar a matrícula e, mediante o formulario dispoñible, solicitar no centro a matrícula aumentada. Unha vez resolta favorablemente a solicitude, poderá realizarse a modificación de matrícula necesaria.
2. A aquelas e aqueles estudantes que se matriculen da totalidade dos créditos que lles resten para rematar os seus estudos, permitiráselles a matrícula aumentada ata 75 ECTS. Neses casos deberán matricularse de 60 ECTS e solicitar posteriormente a modificación da matrícula. No caso dos centros que optaron polo exercicio do requisito da autorización previa da matrícula aumentada, o alumnado deberá seguir o procedemento establecido que se indica no apartado 1.
3. Tendo en conta o artigo 4.4 da normativa, o alumnado adaptado a estudos de grao, procedente de titulacións LRU, poderá matricularse ao longo da súa permanencia no grao do dobre dos créditos que lle restan para obter a titulación.
4. Para a aplicación do artigo 4.4, o cálculo do total de créditos que lle resten por consumir a cada estudante farase restando do total do dobre dos créditos necesarios para obter a titulación, os créditos superados e recoñecidos ata o momento da aplicación da norma, é dicir, anteriores ao curso 2013-2014. Non se terán en conta os créditos matriculados e non superados. A partir do curso 2013-2014, restaranse os créditos matriculados e o dobre dos recoñecidos, sempre que estes non se tivesen matriculados con anterioridade e, de ser así, restarán unha soa vez.

5. Nos plans de estudo nos que o alumnado non teña a posibilidade de matricularse dos máximos establecidos nos artigos 3.2 (60 créditos) ou 3.6 (75 créditos) da normativa, poderanse superar ditos máximos ata un 10% coa autorización do órgano de dirección do centro, sempre que dita superación sexa orixinada pola matrícula dunha única materia.
6. No caso de rendementos académicos excepcionais e previa solicitude ao Decanato ou Dirección do centro, o órgano competente de cada centro poderá autorizar a ampliación de créditos máximos de matrícula, recollidos nos apartados anteriores.
7. No caso dos plans de estudo de máster e doutoramento que requiran a superación de complementos de formación, os créditos destes non computarán aos efectos da matrícula máxima e mínima establecida no artigo 3.2. da normativa, quedando exceptuada nestes casos a posibilidade de cursar simultaneidade de estudos.
8. O alumnado matriculado en estudos de programacións conxuntas (simultaneidade) queda excluído do cumprimento da normativa de permanencia e rexerese polo seu regulamento específico.
9. O alumnado matriculado no grao en Enxeñaría Mecánica no Centro Universitario da Defensa de Marín, queda excluído do cumprimento da normativa de permanencia e rexerese polo seu regulamento específico.
10. Ten a mesma consideración de trasladado para continuación de estudos o alumnado que accede por recoñecemento dun mínimo de 30 créditos, como o que se incorpora a unha mesma titulación polo proceso xeral de admisión (preinscrición), segundo o artigo 56 do Real decreto 1892/2008, de 14 de novembro.
11. Con respecto ao artigo 3.4. o alumnado poderá solicitar á Dirección do Centro o cambio a matrícula parcial por causa sobrevida, debidamente xustificada nas condicións que dispón o artigo 3.4, ata o período de modificación de matrícula do segundo cuatrimestre.
12. Aos efectos do cumprimento do artigo 4.1b, o rendimento mínimo para os/as estudantes que combinaran períodos de estudo a tempo completo (TC) con períodos de estudo a tempo parcial (TP) será:
 - 42 ECTS para estudantes cun ano a TC e 2 a TP
 - 48 ECTS para estudantes con 2 anos a TC e 1 a TP

13. Excepcionalmente, respecto ao alumnado que ten que completar os 300 créditos requiridos para o acceso a estudos de doutoramento, entenderase que os apartados 3.2. e 3.3. permiten a matrícula de menos de 48 créditos, na modalidade de tempo completo, e de menos de 24 créditos, na modalidade de tempo parcial, para os efectos de poder acadar ese mínimo de 300 créditos.
14. Dado que está pendente de aprobación polos órganos correspondentes unha nova normativa de permanencia que modificará substancialmente os artigos 4.1 e 4.2, con carácter excepcional non se impedirá a continuación dos estudos ao alumnado afectado por ditos artigos.

A presente instrución de aplicación da normativa de permanencia derroga a anterior de data 30 de xuño de 2015.

Vigo, 4 de xullo de 2016

A vicerreitora de Estudantes



Dolores González
Dolores González-Alvarez

